



N 21/5339
16/09/2022

5339-21-2-202209161149



შპს „იქსენერჯი გრუპს“

მის: სამტრედიის მუნიციპალიტეტი, სოფ. იანეთი
ელ.ფოსტა: info@xenergy.ge

ასლი: სსდ გარემოსდაცვითი ზედამხედველობის დეპარტამენტს

სააგენტომ განიხილა თქვენი 2022 წლის 25 აგვისტოს გარემოსდაცვითი გადაწყვეტილების მიღების მიზნით წარმოდგენილი N4311 განცხადება, რომელიც ეხება სამტრედიის მუნიციპალიტეტში, სოფ. იანეთში ასფალტის საწარმოს მოწყობასა და ექსპლუატაციას და გაცნობებთ შემდეგს:

- საქართველოს გარემოს დაცვისა და სოფლის მეურნეობის სამინისტროს 2022 წლის 22 თებერვლის N7 სკოპინგის დასკვნის თანახმად, გზშ-ის ანგარიშში წარმოდგენილი უნდა იყოს „პროექტის ალტერნატიული ვარიანტები, შესაბამისი დასაბუთებით. მათ შორის არაქმედების ალტერნატივა, **ტექნოლოგიური ალტერნატივები**, ობიექტის განთავსების ალტერნატივა და გარემოსდაცვითი თვალსაზრისით შერჩეული ალტერნატივების დასაბუთება.“ გზშ-ის ანგარიშში არ არის წარმოდგენილი ტექნოლოგიური ალტერნატივების შესახებ ინფორმაცია და აღნიშნულია, რომ „ასფალტის წარმოების ტექნოლოგიური ალტერნატივის განხილვა არ მომხდარა, რადგან ტექნოლოგიური პროცესი იდენტურია, გამომდინარეობს მისაღები პროდუქციის მარკიდან. კომპანიის მიერ მოხდა დანადგარის ტიპებისა და მარკის შერჩევა“ (თავი 9.3.). გზშ-ის ანგარიშში წარმოდგენილი უნდა იქნას ტექნოლოგიური ალტერნატივები, შესარჩევად განხილული ასფალტის საწარმოს დანადგარების მახასიათებლების მითითებით;
- გზშ-ის ანგარიშის თანახმად, თეორიულ გაანგარიშებასთან ერთად, შესწავლილი იქნა შპს „იქსენერჯის“ ქვიშა-ხრემის სამსხვრევ-დამხარისხებელი საწარმოს ხმაურის გავლენა დასავლეთით განთავსებულ საცხოვრებელ ზონაზე. კერძოდ, აღებული იქნა სამი საკონტროლო წერტილი, რომელთა GPS კოორდინატები წარმოდგენილია დანართში 4 (გვ. 229): 1. X-0286090, Y-4671779 (სამსხვრევ-დამხარისხებელი დანადგარი); 2. X-0286027, Y-4671756 (საწარმოს საზღვარი); 3. X-0285877, Y-4671663 (უახლოესი მოსახლე). მონაცემთა ელექტრონული გადამოწმების მიხედვით, უახლოესი მოსახლის GPS კოორდინატი - X-0285877, Y-4671663 არ ემთხვევა საცხოვრებელ სახლს, ამასთან როგორც სამსხვრევ-

დამხარისხებელი დანადგარიდან, ისე ასფალტის საწარმოს ტერიტორიიდან უახლოესი საცხოვრებელი სახლი (ს/კ 34.07.47.025) მდებარეობს უფრო ახლოს (სამსხვრევ-დამხარისხებელი დანადგარიდან დაახლოებით 210 მ, ხოლო ასფალტის საწარმოდან 243 მ), ვიდრე კვლევისთვის შეფასებული უახლოესი მოსახლის საკონტროლო წერტილი (X-0285877, Y-4671663). დაზუსტებას საჭიროებს რა მიზნით იქნა შერჩეული საკონტროლო წერტილი და რატომ არ იქნა შეფასებული ხმაურის დონე უახლოეს საცხოვრებელ სახლთან მიმართებაში;

- დანართში 4 წარმოდგენილი კვლევის შედეგად რეკომენდებულია შპს „იქსენერჯის“ საწარმოს ტერიტორიაზე, მოსახლეობის მიმართულებით დამონტაჟდეს ხმაურის დამცავი ეკრანი ხმის ჩამხშობი მასალისგან და ტერიტორიის გარეთ მოხდეს სწრაფმზარდი ხეების დარგვა. წარმოდგენილ გზშ-ის ანგარიშში ხმაურით მოსალოდნელი ზემოქმედების შემარბილებელ ღონისძიებად განხილულია მხოლოდ გამწვანება და აღნიშნულია, რომ საწარმოს ექსპლუატაციის ეტაპზე ხმაურის ჯამური ზემოქმედების გაზრდის შემთხვევაში, დამატებით იქნება შემუშავებული შემარბილებელი ღონისძიებები (გვ. 165). გზშ-ის ანგარიშის დანართში 4 მოცემული კვლევების შედეგების შესაბამისად, ვინაიდან, საპროექტო ტერიტორიაზე ხმაურით გამოწვეული კუმულაციური ზემოქმედება ზღვრულად დასაშვებ კონცენტრაციაზე მაღალია, მნიშვნელოვანია ზემოაღნიშნული რეკომენდაციების გათვალისწინება და შპს „იქსენერჯი გრუპის“ მიერ ხმაურით გამოწვეული ზემოქმედებისთვის დამატებითი შემარბილებელი ღონისძიების გატარება - ხმაურის დამცავი ეკრანის მოწყობა, რაც ასახული უნდა იყოს გზშ-ის ანგარიშში;
- N7 სკოპინგის დასკვნის მიხედვით, საწარმოო ობიექტიდან უახლოეს მოსახლემდე მანძილის, ასევე ადგილობრივი მოსახლეობის საპროტესტო განწყობის გათვალისწინებით, მნიშვნელოვანია გზშ-ის ეტაპზე წარმოდგენილი იქნეს - პროექტთან დაკავშირებით ადგილობრივი მოსახლეობის ინფორმირების, მათი პოზიციების, დამოკიდებულების, აზრის გათვალისწინების და შეთანხმების (არსებობის შემთხვევაში) ამსახველი ინფორმაცია. ზემოაღნიშნულთან დაკავშირებით გზშ-ის ანგარიშს თან ახლავს სამტრედიის მუნიციპალიტეტის მერიის წერილი (დანართი 5), სადაც აღნიშნულია, რომ კომპანიის თხოვნის შესაბამისად, მერიის მიერ დაიგეგმა სოფ. იანეთის პირველი უბნის მოსახლეობასთან შეხვედრა, რომელიც მოსახლეობის გამოუცხადებლობის გამო არ შედგა. გაცნობებთ, რომ აღნიშნული დოკუმენტი ვერ ჩაითვლება მოსახლეობასთან კომუნიკაციის ამსახველ ინფორმაციად;
- გზშ-ის ანგარიშის თავში 3.2. „გარემოსდაცვითი კანონები“ არსებული ჩანაწერი „შპს „ჯეო მეტალის“ ფეროშენადნობთა საწარმოს გარემოზე ზემოქმედების შეფასების ანგარიშის მომზადების პროცესში გათვალისწინებული კანონების ჩამონათვალი მოცემულია ცხრილში 3.1.“ გაუგებარია და საჭიროებს კორექტირებას;
- გზშ-ის ანგარიშის ცხრილში 7.1. მოცემული ს/კ 34.07.47.209 მიწის ნაკვეთის წვეროთა კოორდინატები და საკადასტრო საზღვრები ერთმანეთს არ ემთხვევა, რაც საჭიროებს კორექტირებას;
- გზშ-ს ანგარიშში არ არის წარმოდგენილი სათანადო ინფორმაცია არახელსაყრელ მეტეოროლოგიურ პირობებში საწარმოს ფუნქციონირების შეზღუდვის ღონისძიებების შესახებ, რომელიც მოთხოვილი იყო N7 სკოპინგის დასკვნის შესაბამისად;
- გზშ-ის ანგარიშის თავში 9.2. „საწარმოს განთავსების ალტერნატივა“ მითითებულია, რომ პირველი ალტერნატიული ტერიტორიის მიწის ნაკვეთს დასავლეთით ესაზღვრება E-60 ავტომაგისტრალზე ასასვლელი გზა. გზშ-ის

ანგარიშში მოცემული ნახაზის 9.1. და მონაცემთა ელექტრონული გადამოწმების შედეგად დგინდება, რომ E-60 ავტომაგისტრალზე ასასვლელი გზა განთავსებულია ტერიტორიის აღმოსავლეთით, რაც საჭიროებს კორექტირებას; ამასთან, დოკუმენტში მოცემული მეორე ალტერნატიული ნაკვეთის საკადასტრო კოდი (34.07.47.2011) არასწორია და საჭიროებს დაზუსტებას;

ამასთან გაცნობებთ, რომ გარემოს დაცვისა და სოფლის მეურნეობის მინისტრის 2022 წლის 23 თებერვლის N2-133 ბრძანებით დამტკიცებული სკოპინგის დასკვნა N7 (22.02.2022) გაცემულია სოფ. იანეთში შპს „იქსენერჯი გრუპის“ ასფალტის საწარმოს მოწყობა-ექსპლუატაციაზე, თუმცა წარმოდგენილ გზშ-ის ანგარიშში აღნიშნულია, რომ საწარმოს ტერიტორიაზე ობიექტის მოწყობის სამუშაოები უკვე დასრულებულია და ყველა ძირითადი მოწყობილობა უკვე დამონტაჟებულია. აღნიშნულიდან გამომდინარე, დეტალურად საჭიროებს დაზუსტებას ასფალტის საწარმოსა და შესაბამისი ინფრასტრუქტურის მოწყობის საკითხები.

სააგენტო კანონმდებლობის შესაბამისად, გარემოსდაცვითი გადაწყვეტილების მიღების მიზნით, ადმინისტრაციულ წარმოებას დაიწყებს ზემოაღნიშნული შენიშვნების გათვალისწინებით „გარემოსდაცვითი შეფასების კოდექსით“ განსაზღვრული სრულყოფილი დოკუმენტაციის წარმოდგენის შემდეგ.

თამარ ფიცხელაური

თ. ფიცხელაური

სააგენტოს უფროსი

სსიპ გარემოს ეროვნული სააგენტო

